

**PEMBERITAHUAN PERTANYAAN BUKAN LISAN
MESYUARAT KEDUA, PENGGAL KEEMPAT, PARLIMEN KE-14
DEWAN RAKYAT**

PERTANYAAN : BUKAN LISAN

DARIPADA : TUAN OSCAR LING CHAI YEW [SIBU]

SOALAN

Minta **PERDANA MENTERI** menyatakan bilakah laporan perbincangan MA63 akan dibentangkan di Parlimen. Huraikan perkara yang dibincang dalam jawatankuasa khas MA63.

JAWAPAN

**YB DATO HAJJAH HANIFAH HAJAR TAIB, TIMBALAN MENTERI DI
JABATAN PERDANA MENTERI (HAL EHWAL SABAH DAN
SARAWAK)**

Tuan Yang di-Pertua,

1. Untuk makluman Ahli Yang Berhormat, buat masa ini, Kerajaan berpandangan tiada keperluan untuk laporan Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKKMA63) yang telah dilaksanakan oleh Kerajaan sebelum ini dan perbincangan di bawah Majlis Khas MA63 dibentangkan dan dibahaskan di Parlimen. Kerajaan pada masa kini sedang memberikan tumpuan bagi melaksanakan keputusan-keputusan dasar yang telah dipersetujui di bawah JKKKMA63 sebelum ini dilaksanakan dalam tempoh waktu yang sewajarnya.

2. Secara keseluruhan, semenjak diluluskan penubuhannya oleh Jemaah Menteri pada 9 September 2020, Majlis Khas Mengenai Perjanjian Malaysia 1963 (**Majlis Khas MA63**) telah bermesyuarat sebanyak 3 kali iaitu pada **2 Disember 2020, 13 April 2021 dan 18 Oktober 2021**.

3. Seperti mana Ahli Yang Berhormat sedia maklum, keputusan-keputusan yang telah dicapai di bawah Jawatankuasa Khas Kabinet Untuk Menyemak Pelaksanaan Perjanjian Malaysia 1963 (JKKKMA63) sebelum ini merupakan keputusan dasar yang mana masih memerlukan tindakan lanjut sebelum dapat dilaksanakan sepenuhnya. Walau bagaimanapun, sukacita saya ingin memaklumkan bahawa terdapat beberapa perkara telah selesai dibincangkan dan telah dibawa untuk perakuan Majlis Khas 1963 untuk dilaksanakan seperti berikut:

- (i) Penyerahan Kuasa Kawal Selia Penedaran Gas (*Liquefied Petroleum Gas – LPG*) Kepada Kerajaan Negeri Sarawak telah selesai dilaksanakan sepenuhnya pada 1 Jun 2021;
- (ii) Kuasa Pentadbiran ke Atas Pulau Sipadan dan Pulau Ligitan Kepada Kerajaan Negeri Sabah, Majlis Khas MA63 bersetuju supaya Perintah Kawasan Larangan dan Tempat Larangan bagi kedua-dua pulau dibatalkan namun tanggungjawab berhubung keselamatan adalah masih di bawah Kerajaan Persekutuan;
- (iii) Cadangan Rang Undang-Undang Perlembagan Persekutuan (Pindaan) 2021 pula telah diperakukan oleh Majlis Khas MA63 pada 18 Oktober 2021 dan telah dibawa kepada Jemaah Menteri pada 21 Oktober 2021. Bacaan Kali Pertama adalah pada 3 November 2021 dan Bacaan Kali Kedua RUU juga dijangka pada sidang mesyuarat Parlimen kali ini.
- (iv) *Empowerment* Pelesenan Laut Dalam Sabah turut diperakukan oleh Majlis Khas dalam mesyuarat yang sama. Pelaksanaan (dengan izin) *empowerment* Pelesenan Perikanan Laut Dalam Sabah dijangka akan mula dilaksanakan pada Disember 2021. Majlis Khas juga bersetuju supaya kuasa yang sama juga dipanjangkan kepada Pengarah Jabatan Perikanan Laut Sarawak.

4. Manakala, lain-lain perkara seperti Penyerahan Kuasa Kawal Selia Gas dan Bekalan Elektrik di Sabah, Kuasa Buruh di negeri Sabah dan negeri Sarawak dan Kuasa Baki Mengenai Alam Sekitar sebenarnya masih memerlukan pindaan yang melibatkan undang-undang di peringkat Persekutuan mahupun di peringkat negeri Sabah dan Sarawak atau memerlukan perubahan kepada dasar-dasar sedia ada seperti pindaan kepada peraturan-peraturan yang berkaitan, pewujudan mekanisma baharu serta perkara-perkara lain yang melibatkan penyelarasan dan pelaksanaan secara pentadbiran.

5. Selain itu, terdapat juga isu-isu lain yang sedang dibincangkan di peringkat Jawatankuasa Kerja yang ditubuhkan di bawah Majlis Khas MA63 iaitu seperti:

- (i) Semakan Semula Pemberian Khas di bawah Perkara 112D Perlembagaan Persekutuan;
- (ii) Perkara berkaitan keselamatan negeri seperti isu sempadan negeri Sarawak, isu imigresen seperti IMM13, Burung-Burung, Kad Banci dan PATI di negeri Sabah; dan
- (iii) Keperluan infrastruktur asas di negeri Sabah dan Sarawak seperti jalan raya, air/elektrik, kesihatan, pendidikan, digital, kemiskinan dan perumahan rakyat.